

四庫全書

集部

欽定四庫全書

集部

東牟集卷三

詳校官左中允<sub>臣</sub>瑋五珠

主事<sub>臣</sub>呂雲棟覆勘

謄錄貢生<sub>臣</sub>劉錫珪

謄錄監生<sub>臣</sub>黃維

欽定四庫全書

東牟集卷三

宋 王洋 撰

五言律

晚宿村居

早起林鴉泊荒籬四面同  
田夫留古意野水識和風  
倦僕欺予遠疲輿念汝功  
爾嫌冬日促吾興在寒空

自忻村被酒歸失方竹杖

我貧難致遠得此有黃緣  
弟為兄身老書來意已傳  
扶

衰惟獻直入手不隨圓偶向醉中別如何不黯然

夜聞賽神鼓

坎坎豐年鼓鱗鱗賽社人神寬陟降禮情取笑言真掩  
豆豚肩薄分餘福罍頻靈壇本宜夜考鼓已疏津

重九日至雲號

梯山七千丈接跡上清虛鐘雜鈞天奏僧參梵帝居攝  
衣鵬展背灑墨鴈添書今日登高眼平生總不如一云  
平日

登高計今  
朝獨不踈

歲晏書事

打打鳴牕雨昏昏帶岫雲酒寒難作熱爐冷不成熏梅  
頗夢中笑鴈聲愁處聞傷懷目前事細數費云云

樂飲

何意親杯杓初期樂性真若教狂勝德多被酒忘身談  
笑交情密氤氲酒力醇勸酬如錯雜莫過兩三巡

安眠

隨處便隨眠昏昏息萬緣魂如雙翅蝶身在四禪天素

飾羅為幌芳茵錦作筵心如懷寵辱未必得安然

觀擊食

結習慕金僊西方省問禪時分四季社報積後生緣念  
戀期無間辛勤已有年會緣如有約此理自誰傳

五老峰

案詩二首其一  
見七言絕句

已作人間瑞飛空老尚豪勢分方岳重名列緯星高月  
夜霜添髮花晨露染袍此翁無奈事占詠亦徒勞

遊呂庵偶題

結屋得勝處羣山簇畫屏春城花覆白

四顧遶城皆李花盛開野

路麥鋪青趁暖鳩呼婦先時柳化萍年年寒食近心自

歎飄零

無盡齋詩

案集中有無盡齋記為清江韋子作此詩三首其一見七律

造物本無盡貪求乃不公此能隨量取彼亦一無窮水  
底家家月窗前處處風要知真宰意不在有無中

潢潦集須臾朝盈夕已除沛然隨飽滿廊爾是清虛金  
穀輸倉篋錙銖較簿書不知方寸地無計脫苞苴

題楊道人庵庵基舊縣邑有廢井存

空室寄空山柴門不用關  
虛心觀夢幻塵世獨清閒  
舊井前村古新泉一勺慳  
蕭條齋粥外身世有無間

寄題韓勉夫枝巢

萬物各有性逍遙即自安  
均鳩得巢易躁蟹寄身難  
莫羨高頭樹須防靜處丸  
如今洛陽第誰到子孫看

逍遙惟所適小大浪殊觀  
溟渤鯤鵬近藩籬燕雀寬  
宅高非遠害藏密定成安  
不似南山樹枝間有彈丸



適時非履險足分不憂貧須信人間世宜思物外身榮  
柯堪歎蟻飽露可憐螻更謝東方朔能安一老臣

望山間西際寺

聞說林間寺攀蘿一徑斜有僧眠雪月無客賞風花丈  
室虛名在方袍歲事賒空王無係著破屋便傳家

三峽橋

萬馬戰空山聲馳宇宙間窺高增健大照勇怯孱顏洗  
石無千古招僧過一關不知平去易何似倒流艱

此日湖源回展叔穎書頗及往歲經行暨諸同志賞梅花之一笑急景相催又復幾年感而有作因寄叔穎并呈子楚

憶昨越溪曲官梅正發時追隨連日飲酬唱幾篇詩淡佇看人意清香許自知憑誰將恨寄為說鬢成絲

寄彥文

張子蕭條後空山十五年餅無粟遮眼門有客求錢折補經綸手拘留徧短緣尋詩有情否旋送兩三篇

寄夏孝叔

夏子賦分淺淒涼不喜看星星脫兵火歲歲獨饑寒世  
若均如子人應不羨官如何閏月底怨淚亦闌干

以前所聞

事末章及之

寄周表卿

不見秘書久經時失寄書交情猶繾綣遣訊問何如郡  
籍藏崑府班行近玉除自憐無籍在不敢夢華胥

簿領正塵埃天邊驛使來姓名傳寶琰朋舊集蘭臺始

望豈及此故人安在哉曾陪丞相幕撫事勿驚猜

首尾裁十

年故舊雖有顯仕而亦多淪謝念之愴然也

寄永新元老元書云已辭廣孝復歸禾山白雲  
矣

已尚清高久須教去住艱強分雲出岫終放鶴歸山煙  
帶重嵐潤衣侵霧雨斑輕身如有藥猶恐費躋攀

寄熊叔雅

天上郎官宿人間又幾年莫思華轂貴好種錦溪田山

色青盈眼梅花雪滿川  
儻因魚鴈信時寄兩三篇

寄陳元載

太丘傳祖道作邑興何如  
著意招風月隨緣遣簿書  
吏參名例外詩託笑談餘  
偏憶當樽酒論文意不踈

送砮父守光州

沉戟卧江臯詩人擁節旄  
便期犀結帶安事馬騰槽  
地入淮源重霜隨鴈信高  
命書催入覲應及薦香醪

送小劉解元赴試南宮

衰年稅簫寺偶與鳳巢鄰萬里刷鮮羽一鳴驚衆人寒  
催征騎急春接賜袍新折取如丹桂歸榮鶴髮親

寄伯氏

同占溪名邑還從佛借居懶便書眼暗靜愛酒杯踈山  
路間供課僧房步當車地爐貪軟火未得賦歸歟

贈龜峰書記

本是三山侶閒為七澤游放寬千里目散遣一身愁詩  
韻松來往經牕竹獻酬蒙頭一衲外萬事看浮漚

贈恭侍者

學有千門路恭為百行初謙和人愛重放傲腹空虛樹  
大求斤斧皮柔易卷舒請君觀巨海萬水豈能如

寄題鄧成之粟庵

鄧吉州永新人 粟詩  
二首其一首見七言古

一粟本非慳縱橫透入關要知千種解不離一塵間透  
徹通真境拘留即妄攀須彌聊比喻未是最高山

崇壽印師以詩見惠次韻答之

客問王居士如何是半僧袈緣都未盡學道又無能身

世隨忙業妻兒飽歲登時逢方外士陪奉說心燈

贈辨侍者

莫恨常無辨須防辨有魔易生人我見恐為記持多弄  
巧它生怨藏鋒性自和辨心休辨口方信是婁羅

郊行

曾問征夫路名山兩日程能銷幾兩屐况值一川晴詩  
欲謀於夜雲多不近城暮年塵事有逐處得心清

次韻曾吉父清明



暄晴猶苦促那更遇春霖花色存餘態春臺得重臨主  
觴方意展客意已愁侵是底書生事時為洛下吟

吉父賦南池詩次韻吉父詩雖云紅蕖在眼而  
獨與白鷺關情蓮上人何望輒戲呈

水府朝元路牙分女隊行神仙天外事風月世間情步  
有凌波勢廊無響屨聲何妨沉醉後珠履小縱橫

和曾鉉父春半書懷

節物各自好春風獨太華裝添山衣錦零落地鋪花趂

課蜂招侶幽吟鶴自嗟放開平望眼翠幙不須遮

敲火開香焙書齋思漸清田翁新社長巢燕舊門生學  
僻詩無味心閒語見情不愁無樂事正與物俱榮

今日前溪好晴空事事明草長顏色重鳬煖去來輕游  
女矜高髻書生厭短檠懸簾雖過午碧澗煮芹羹

和曾鉉父雨中詩

案牘無尊骨畦丁有賤疏鳬驚憑岸汜雲海占空虛婦  
老能論舊兒癡尚帶吳旁人如見問老子即遷居

往年茅屋水痕過一由旬人論方宜夏心驚已畏春花  
光如勸酒山色獨談真補拙供吟課聊開一笑頻

和旼父連雨快晴

十日雨易滿一鳩鳴更多開眉初對月生耳不憂禾兔  
走無留跡輪空不受它乘風若歸去九虎莫誰何

官無三不遇身負四宜休無意花迷眼唯因月上樓役  
車懸白地社鼓祭黃收何事關心切逢人說有秋

和春雨韻

客路元來促春情本自長送愁誰納款遣癖又無方失  
性陪飄雪凋顏自染霜吟君春雨句縈拂為牽腸  
榮辱一時夢浮生百種心愚因難化穩懶為不治深分  
退何須卜貪高每自斟須君說情話澤畔欲行吟

和曾毓父中秋前六日二詩

怪底暑風淺明珠照座寒鋪張平地錦峻激急流灘吟  
諷千篇過更移一字難少留明艷句拂拭菊花間

誰將兔消長用卜月陰晴三穴由來暗中天本自明金

盆如未滿玉笋為誰傾處處隨人去長空不送迎

和曾旼父促叢珍之集

布穀但催耕鳴鳩不喚晴風添前夜急花負去年盟老去歡娛少茶多懷抱清論文一樽酒何日向人傾

和旼父留別

細雨關山路梅花識舊鄰擁旄紅額騎抹杖白頭民故國悲王粲年光送李頻遙瞻解鞍馬正是小陽春

卧鼓開亭障斯人久晏然宣王思采芑羊祜保新邊妙

手傳千葉鰲頭控六連使君雙眼闊塞草不供憐

和馮父問訊吉父

北園依梵度東郭據梧桐鶴並千年骨詩傳一祖風有  
愁添鬢白無藥駐顏紅臺上秋期句思君類渴虹

困臂知三折攻頑費七旬不聞覆杯水能救一興薪俗  
傲軒轅聖巫誇越女神百年勾漏術觸處白頭新

和鄭丈戲贈馮父

生疎僮僕賤顏色病妻同定有明人眼真煩壽乃翁仙

曹歌法曲詞伯綴秋風不是人間譜霓裳墮月中

和馭父答鄭丈

鄭圃潛仙客陳留繼阮生掄才俱道用昌譽得詩鳴未  
解侯三接先歌玉六成篇篇多瘦骼疑似帶銅聲

和鄭貳卿別賦

病逐秋風至年隨塞草衰家如百年夢身入四愁詩北  
焙聯圭壁南薰潤岳池齋房多勝事可但滑琉璃

又和新字

清秋移象緯皎月一更新巖桂陪賓席黃花似故人詩  
參工部正道入醉鄉醇遙指靈山下長衫賽社神

和伯氏示兒姪

屋僻唯宜靜櫳踈巧受寒衾光宵獻白爐火晝無丹潦  
倒投僧梵依稀似宰官一錢不停蓄却喜布囊寬

和方簽判詩乞芭蕉於教官

緗帙文書展青衿懷抱空花前添翠幙句後捲詩筒雲  
重能鄣暑身輕不礙風相期三伏日借此作寒叢



和酬鄭共老

萬事易瓦裂故人情未休  
慙慙一詩語辛苦百端求  
書託峰頭雁人隨海上鷗  
終期斷湖尾卜築共良謀

江如晦以詩送蕙一本以詩謝之

幽芳不弄妍人意自推先  
比德人間願同心事外賢  
香因天力與名自楚詞傳  
桃李多顏色相逢不敢鮮

謝筠守趙從周寄黃蘗中洲茶

道院文書靜傳籤報兩衙  
籠山踈藥圃祖寺摘春茶  
珍

品少為貴佳名遠更誇要知清白德盞面看浮花

李丞相挽章

名紀三朝重身居百辟師華夷占用否進退繫安危見  
夢英靈在成功命數奇出師身已老垂淚憶當時  
風雲扶日月堯舜正衣裳壯烈周方叔從容漢子房鼎  
彝酬鉅業典禮賁幽光悵望它山遠千年綠野堂

王侍郎挽章

案此詩二首  
其一見七律

位列仙官籍名隨海賈船前旌衝瘴雨拱木兆新阡玉

骨埋黃土金聲麗藻編兩行懷舊淚灑向菊花天

曾侍郎挽章

道盛當堯日名高嗣聖初人推金鼎望帝念玉樓居舊  
典尊王迹傳家教孝書崇文華夏事澹泊寄情疎

未下蒲輪詔先驚栢府寒九州方鎮節萬里使華冠歲  
晚一菴密風流百世寬永懷函丈訓泣涕自沈瀾

呂尚書挽章

古遠儒冠拙時忙壯士尊百年難保命萬里未歸魂身

後塞翁馬生前廷尉門悲笳咽遺恨行矣不須論

載績世基日羣公扈聖年伏蒲鳳岡上持節鴈峰邊外  
間風猷遠中臺出處全履聲傷易盡不得輔中天

四海詘伸勢安危俯仰殊犬戎蟠洛邑晉鄙握兵符楊  
李生同烈高秦死異區誰如雙劍化義烈一門俱

挽向倅

案詩二首其一  
一見七律

襟量塵埃外功名慷慨中人懷不滿望身有未全功逸  
氣猶驚眼馳光息轉蓬蕭條古原上松柏自號風

挽程伯禹

盛德師千古高名滿四方位登三品貴身任百夫防公  
在衣冠重公歸遠近傷哀榮終始事褒典在徽章  
待問盈朝日羣生解褐初太常方奏第儒館下除書出  
入勞忠蓋襟懷自卷舒如何奪公早不得待懸車

挽焦適道寺丞

學有千箱富言無一字欺脊令慈孝地兄弟急難詩頌  
美觀名士傳家付令兒平日磨玷缺此理上天知

前兵  
戈時

骨肉散失後與元昆相得於三衢慈孝坊人以為誠  
意有感又兩郡多令政時賢亦為賦詩今為兩集

疊疊談多緒諄諄意恐傷行孤違眾好誠盡是君長生  
死人間異經營地上忙靜中如有趣遺譽自芬芳

挽喬民瞻

案詩二首其一見七律

世德書青史榮名在本朝如何元士葬不得大夫招惆  
悵空蕭瑟秋風正沈寥遙看古原上松柏暮蕭蕭

臧夫人挽詩二首

奕世流芳遠傳家慶有餘簪荆頻薦潔曳練寶粧踈載

德光門閤成名振里閭如何裁半日一旒向輶車  
義有臧侯者寥寥幾百年豈唯君子貴亦有女郎賢寧  
捨家藏富先歸宿貸錢自然難到處風烈是家傳

哭嘉彥

釋躋淮西土平生質勝文形模笑婦女術業富丘墳客  
路酒歡喜官曹名放紛銀章猶斷壠餘事付青雲

哭李清卿侍郎

薄壘擅車咽危臺斥候移孤忠萬夫望獨許寸心知義

動乾坤正生殘日月虧南山竹有限難盡泣君辭

金石雖云久精誠諒不移但期忠可仗誰謂敵難知  
極天應泣難諶信有虧報君如不盡禍福定虛辭

皇澤淹時久人懷孝可移不應當後患端恨未前知  
破言猶壯身亡義不虧青編照千古昭代有芳辭

眼見盟城築俄聞鐘鼎移憶君還拭淚胡爾大無知名  
擅千鈞重功無一簣虧殺身因主辱獨為實前辭

賦紅梅



為怯清宵短然膏約凭欄頗疑西子醉花誤北人看點  
露燕支破啼粧風雨殘莫嫌翠袖薄猶得護春寒

初螢

腐草漸時澤翩然變化功分光衣作炫乘暗力排空自  
表因存照雖多不暖風偶緣膏火盡得到兀窗中

病眼

案詩二首其一見七言古

飛花無復數遇物輒成雙書畫踈幽閣屏幃戀北牕懶  
開辭俗客寫望憶秋江椒菊供朝餌猶須發酒缸

五言長律

和陳長卿五人同集韻

受廬均宅畝寸矩漸經營湖泛輕舟遁峰排老岫嶸牧  
之推上第吏部絕心兵列爵分全服和聲奏大庭暫辭  
侯馬貴聊撫帝絃清泰在穀為重難緣德勝鯖無功湏  
滿斗仲雅計全升顧我窮難送如公福正榮惠施書已  
富陵也句初鳴徑醉相逢樂亡聊一洗平

省題泰帝鼓瑟

雅樂聞琴瑟相因泰昊前朱絲疑雜奏素女減哀絃破  
竹符終合分魚目不全所餘裁五五再續未綿綿損益  
時皆有虧成理或然茫茫千古意漢帝自誰傳



欽定四庫全書

東年集卷四

宋 王洋 撰

七言律詩

新隱四首

紫上饒志王東年遷居上饒有新隱詩即此詩也

四注飛簷略勢寬  
江湖城郭得同看  
縱饒縮地神僊術  
長要移人視聽難  
僊子月多呈顧兔  
女兒牀晚欲棲鸞  
使君飲散攢燈火  
長怕浮空水面寒

古亭

題輿記榻得高賢  
寄意真同物象先  
收拾蕪菜成院落

勗量邊幅占風煙登臨斗覺今知要雲水從斯入畫傳

斫竹洞門無鎖鑰時携客枕一慵眠

新亭

香分淨社色專城冠蓋如雲照乘明曉露一粒秋艷曳

涼風吹月夜經營戲荷魚小波紋近憂玉船低笑響輕

聞說笠乾燒供夜無邊華燭競歡迎

荷池

郭外溪流溪外山山峯長在白雲間開懷幸對百年友

屈指何憂一日顏煩燠尚寬秋占野林巒欲暮鳥知還

夜歸猶隔溪橋水不記重門欲上關

南峯

上元二首

火樹銀花起夜煙  
驂驪朱幃競駢闐  
一千戶外開金鎖  
十二里中然玉蓮  
何日行宮祠太一  
誰從摩詰問諸天  
歌臺且喜宜正月  
柳岸今年勝去年

誰將膏粥飯蠶師  
輕薄兒童覓綵衣  
遊騎但知誇艷麗  
祠門直莫歎寒微  
東城南陌春迷眼  
逐馬隨車醉未歸  
莫怪老翁閒坐久  
鬚髯燈火照柴扉

和尹少稷上元

年少輕衫競彩霄老翁心地寄參寥照人燈火成何事  
示我威儀貴不忒閒却剪刀尋斷夢任隨錦轂縱華鏢  
固知行樂承恩澤亦喜豐年樂一瓢

故人飄泊少相逢喜向雲間得士龍少日功名鵬萬里  
長年風月酒千鍾已知吟思才難敵自嘆簪蟠髮已童  
聞說玉池蓮十丈相期摘實上高峯

三月三十日

寂寞餘紅點翠衣曉風捲盡絮花飛避人黃鳥遠山去



背我青春此日歸  
倦舞柳條猶作意  
侵階芳草不知非  
老無年少尋芳恨  
一榻清風展翠帷

喜雨

去年秋日百神求  
歲度春風尚未優  
補貼稀疎三日澤  
栽培飽滿一年秋  
已乾桑柘蠶多飽  
待濟舟航水接流  
雲雨筭來多少力  
夕陽處處聽漁謳

苦寒

平侵爐火易成灰  
穩閉齋扉不用開  
浩蕩晚風隨伴起

遲回前雪待朋來他無雜念專思酒縱有交情敢憶梅  
靜坐不聞簫鼓急土牛莫是送春回

和苦寒韻

秋容落落轉頭空誰與元冥競長雄  
侵剝老條無硬對栽培玉樹是家風  
漫誇鶴骨飛饒健彊說龜腸語轉工  
對此只宜常袖手明年春物共君同

一夕大風偶成呈諸兄簡士修思遠

狂飈一夜撼天闕徹曉陽烏勢未還  
早恨餘寒誇老健

重憐新物損朱顏  
強留殘火如相別  
已典春衣不可攀  
料得雲端風背上  
融和那肯似人間

雪晴

牆角寒梅未試鹽  
熬波何事被凝嚴  
解教爐火添餘燼  
似妬陽烏到短簷  
幽谷但期回暖律  
交光何用映疎簾  
朝來一掃窮陰處  
先照羣峰竄上尖

冬節日疾作不能親祀事  
但具禮不拜戲作示  
內

他鄉易感歲時侵病入衰骸苦不禁卧聽兒孫羞栗脯  
倦依爐火只愁吟房無肥腠牲三俎幙有馨香酒數斟  
苦與黔婁分等級尚為吾婦莫傷心

歲除前一日病中作

客寄他年又一鄉椒花隨興飲杯長病疑寒健銷陰脉  
愁怯花寬笑酒觴去住自知身老大經過長恨歲窮忙  
眼前兒女陪懽悅年少從教各自彊

病痰有感

氣堙風貫血行遲運用工夫了不知待盡生涯蠶作繭  
就衰榜樣髮縹絲稍因對酒頭先眩未是多行力早疲  
更若尋思年少戲如何不送老頭皮

琴枕

琢石髹池省練絃寂塵不動五音全應嫌雜奏妨人樂  
正可常攜對客眠投倦乍如傾耳聽起醒惟欠籟聲傳  
舞雲家範升堂席寂寞依稀萬古賢

關方丈地供香火

全家共寄一庵中  
庖滌因連奧  
昨通穴不容身  
銜窶簋芥分餘地  
結齋宮  
幾甌粥  
借鄰僧飯一瓣  
香尋祖佛風  
十笏比丘居  
有限色羅眷屬要無窮

從鄰庵求浴

口多屋褊分張窄  
堂室齋庖約畧分  
春服乍成宜穩貼  
浴盂無處集蘭薰  
供分清淨如霑露  
氣郁芬芳過食芹  
自引一杯歸路穩  
從教歌詠不成文

閒中即事

蟲有鋌矛獸有戈江中飛燕避淘河點紅翡翠飛傳錦  
展翅鷓鴣卧晒蓑絕境芳菲時喚客隔林機杼夜催梭  
平生約略閒忙境到底閒中得較多

即事

官閒久媿叨祠廩身幸真堪學種瓜月給郡倉三斛米  
日尋山路一川花盤空婢去催燒笋爐暖妻來趁焙茶  
閱盡鄰僧閒况味官供粥飯勝僧家

和邵堯夫韻示兒侄

言貴安徐行貴常與人平淡勿相傷莫貪順路行時快  
到了回思見去長克已定知天降福害人只是自貽殃  
長教言行樞機密此外虛心不用防

觀僧作藏會

推崇社首勸來人歲結春緣轉寶輪誅及米鹽知產罄  
事干生死見誠真歸持福壽憑懷券時及暄和謂有神  
安得勸農官考古春秋禮射莫辭頻

從伯氏携稚孺游保慶卽事



提携未便即歸山暫扣僧園且暫閒  
歲晚東君顏色近  
霜晴寒意有無間  
前溪雨後渾通路  
荒戍人歸不上關  
筇竹一枝天正暖  
却嫌飛鳥倦思還

壬戌立冬十月十一日陪路文周朋携禊祖同  
訪後山道人庵道人出就庵烹茶庵外採菊拾  
橡實以歸偶成即事

倦緣閒景散閒情人未歸庵戶不扃  
試撥柴煙尋宿火  
旋添泉水洗茶瓶  
黃花采采盈衣袖  
橡實離離傍短萍

何日一邱藏曲折與君同伴刷青冥

養生無欠亦無餘種竹圍籬草結廬鑿地覓甘分乳脉  
鉏田得實飽新蔬壁間數本空王像架上都無養性書  
我自病來能晚食從今緩步當安輿

己巳三月十二日陪凌季文游水南陳氏園次  
壁間徐明叔韻

不慚衰白照溪光清晝穿梁訪野堂物外風煙多喜客  
人間草木亦宗王浮花競作爭新艷近侍全收殿後香

秉燭便須期醉賞勝饒吳榜起漁榔

同吳周朋高虞卿尋泉憩積暑下庵

繚繞尋泉遠步遲倦逢籬外敞庵扉門前竹長雲垂舞  
巖下泉甘雪未飛景物偏幽緣舍小茶香看客為僧稀  
相公房舍添人否擬灌春園住翠微

陪方何諸人後庵謝客紀事

後山客館報聘禮野寺僧甌當酒茶雲未散屯知候雨  
溪唯貪漲不容沙草間翁仲今塵跡雪後江梅是故花

一掃窮愁無不足方知謀醉是生涯

同張德和遊沈道士庵

上春甲子送窮日早破煙扉令節求指點葆光僊侶洞  
招期南極老人遊龜前香火木稱士堂後交蟠石作牛

我恐上真無碍意使君息慮是清修

沈自言上真授葆光無碍號興作甚

盛

題僧邀遊梅和庵

地接山腰舍遶泉豐堂巍殿勢蟬聯非禪非律三百輩

有圃有場千畝田中坐獨尊  
司獄佛几前雜事地行仙  
若無生死驚愚俗正恐齋厨亦悄然

中冬下澣一日陪方丈訪客因過向氏園亭有

感

前疏水竹界桑麻桃李畦  
分小徑斜山數青黃人住久  
路排藜藿客行賒雲寒煙合入長暝  
梅懶春催未放花  
聞道蒼頭長兒女主人遊宦不還家

去秋過吳江臞翁園亭追作

水接舟航陸接鞍忙中光景靜中看無窮宇宙規模遠  
出格池臺制度寬一水斯須分靜僻四橋繚繞照波瀾  
擬分風月知何日且趁鱸魚整釣竿

聞沈氏小亭欲往主人辭出先聞趙丞相嘗遊  
籬橫地狹曲相裁倦掃殘花長綠苔連榭似聞兼靜雅  
閒情暫欲洗塵埃料將春色供家用那有芳尊為客開  
怪見門前少車馬多因只要相公來

至法海寺

天有陰晴地有艱一山如隔萬重山偶逢冬少三餘雨  
況置身無百慮闢歲熟役車容借客閒來崖寺可開顏  
懸危既免逢饑虎又得休公半偈還

又題禪客龜峯圖

案洋有遊龜峯七絕一首  
故此稱又題蓋即遊龜峯

時所作也

不用丹青染素翰疎煙分染碧雲端一千里地境中鎮  
三十六峯天半寒巢露葉中呈物象瀟羅帶畔疊林巒  
人間此是清涼藥時向塵中為展看

留題翠峯

陶朱山下金僊宅云是當年故相家去國豈知傳貌象  
扁舟端自訪煙霞平吳霸越功何在弔古傷今事可嗟  
早是登臨饒客淚幾行征雁落寒沙

歸雁亭次東坡韻

平時何憚不成歸猶向亭前送雁飛弱羽可堪繒繳密  
寒沙那得稻梁稀燕吳真恐音書絕城郭猶疑今古非  
若為哀鳴相原野依隨豈惜共卑微



煮泉亭

昔人來去本無情，世自貪賢為結亭。  
身在雲間天繚繞，夢無塵事性疏靈。  
撐腸大欠五千卷，拄眼今看萬疊青。  
景物却因閒處見，前賢詩已說丁寧。

題鄰僧房壁

南窗日暖北窗涼，時節頻移意自長。  
半坐蒲團七家飯，兩函經卷一爐香。  
身辭塵雜元無累，人見朝昏却自忙。  
雪屋夜寒燈火暗，蕭條氣味合鄰牆。

題齊政壁

柳經沈雨舞腰慵  
鷺入新陽曲未終  
照徑自藏塵外境  
憎花不愛世間紅  
橋分知為前溪改  
寺遠因尋別路通  
更待薰風日清永  
長歌呼就滿蒲風

題懷玉上方

蟠踞峯巒面勢多天分  
雄望鎮關河足開煙霧鵬垂翼  
手摘星辰月轉波  
問法舊聞裴相國  
傳經今見李維摩  
禪徒到此棲塵跡  
方信青雲路可過

無盡齋

謹案此詩三首  
其二首見五律

矯首層霄俯翠巒  
虛空不住骨毛寒  
古今等是無窮境  
風月何嫌取意看  
巢寄一枝惟自足  
風搏九萬豈知難  
與君同入逍遙境  
方信乾坤宇宙寬

題龍溪橋

放出清泉疊舊蹊  
行人但渡不沾泥  
與君暫濯紅塵足  
留我長澆白玉畦  
千古蜿蜒潛窟穴  
他年頭角上雲梯  
信知法海津梁別  
認作東林是虎溪

思徑山

汲引凡軀駕海鰲恢張竒壯自僊曹九龍獻宅金園貴  
四衆添花寶範高身住四禪觀夢境眼收萬象比秋毫  
經行會遇登臨處勉策筋骸莫歎勞

僧自臨安歸說遠信

幻形變滅困須臾晚景尤驚歲易徂滿目交遊多故物  
傷心風雨對今吾逝波昨日方追雪覆簷今朝又過衢  
旋打青梅新薦酒且須耳熱聽歌呼

與鄭侍郎

還却天官尺一書清時有味保懸車公年尚壯去何蚤  
古道誰言今不如南部方開新榜麗西清人說舊遊踈  
半簪白髮無拘束不用黃精自掃除

還龜溪成拙句呈給事劉兄

正月下旬如山三月初還

上春日暮暮春頭翠淺芳濃草色柔五十日天和暖候  
一帆風地往來舟楫神得雋驚逢敵酒病尋醫尚入流  
只有風流動文采較量沈謝亦推劉

發龜溪道中

欲窮幽勝遠紛華  
頻向晴空漾釣槎  
霞雜鳬羣歸趁浦  
雪飛鷺陣宿投沙  
山連空秀嫌花雜  
樹遠多圖怕霧遮  
莫怪故園歸未得  
為貪入手好煙霞

餘干見游存誠

世家兄弟久隨流  
少不同嬉老宦游  
身似舟空長信浪  
官如萍轉偶同州  
論文共酌三斟酒  
決勝公圍一局楸  
三百里溪明月夜  
得心情處便相求

二月九日訪仰之聞德茂與壻鄧叔厚蚤作逍  
遙溪濱歎而成詩

貪閒心不受囂塵六十年餘自在身愛水愛山三益友  
如冰如玉兩閒人言無拘畏詩多健酒借豪華力有神  
聞說山中丞相語與君心事最相親

德茂以兩小篇報聘再成一章

不著冠纓不洗塵不將忙事擾閒身舍前自舊存三徑  
林下如今見一人八節灘聲泉喚客數枝墨戲竹傳神

前生定是張公子一見相從意自親

昭武舊同僚見過

半生辛苦路漫漫八月樵川類破酸  
官事到時初覺易人情別後始知難  
苦無私惠違情重儉用官錢得謗寬  
聞說東園墻下柳有時顰蹙念前官

祝舜俞拉希言見訪富春赤亭山居

巖腹紆盤一徑通故勞都騎載郛筒  
先生舊負連城價校尉今煩一箭工  
著雪老山清刻骨添梅官路巧迎風



此身終鮮渾無事共樂郊原浩蕩中

因同年見過有感

青似春袍色發榮變移朱紫漸催成琴因聲急絃難續  
流為池平水不鳴神耗恐因驚寵辱心閒請為減經營  
貧門二十年中夢貴賤存亡歎友生

喜仰之至

江東幕客江西吏各是年過五十時一去塵中勞夢約  
重來物外有心期煙中艇子花前酒竹裏碁聲月下詩

景物不妨俱是舊只添須髮白如絲

喜二曾一鄭歸

木葉黃時拂兩輪馬前同看蚤梅春舊游踏徧千山月  
新歲迎歸三老人梳洗樓前酬鵲語琴書案上掃蛛塵  
只愁鳳詔聯翩下又指天邊問去津

雪中赴季文集

會因率集轉慙懃掃徑寬迎陌上春恩解訊書紅粉戀  
寒消酒力玉花新盤堆青菜春回律甌泛瓊珠月借神

浮白自憐偏戶小醉歸全是夢中人

慈相寄居同院何子感寒僕已似安何尚未出  
似聞亦以冬至人事動搖疾困未解亦成小詩  
分僧半坐小僧圓世故猶尋未了緣小大不同俱示病  
窮通有命只聽天愁看藥裹推難去願見香膠騁不前  
比若扶頭却因酒甘言苦口定誰賢

乞桃竹於令尹

小結幽棲事靜便為無花竹不成村在君百里鳴絃地

成我一方濯錦園按鼓威名知破膽乞花詩句是招魂  
桃溪竹徑如成趣柳岸梅洲却未論

還許推詩軸

許前永州東安令汪彥章姻家

好在東安解戍瓜歸懷珠璧慰生涯翰林詞伯夢中草  
粉署仙郎筆下花已間簫韶還政俗未持旌節自光華  
邦人故眼應回首詩律傳芳又一家

德茂晨起折花花葉中眼上橫衝痛楚因詩戲  
之

幽事相關畧未哀  
蚤乘芳露折鮮枝  
如何引惹傷殘處  
莫是喜歡攀折時  
人見花容如苦愛  
花隨人意亦相欺  
須知恩愛成煩惱  
將命拚花欲怨誰

近聞直學馮子容  
以家產中丘乘之  
賦作詩戲之

千古茫茫不可攀  
仲尼日月照儒關  
生前冷竈七日火  
身後遺基十萬間  
寧許富兒通市籍  
只求賢士共歡顏  
那知等級輸邦計  
亦許顏原見一班

萬席仰之許酒以詩戲之

花色芳菲酒力醲坐中上客索千鍾朱陳繾綣論前契

伎人  
姓陳

子壻牽聯本一宗

二何兄弟皆  
萬壻同席

獨為棊高能假借

衆同酒伴不阿容歸來醉倒終無怨此會心知不易逢

中春二十四日集仰止書室德茂仰止何彥亨

彥發鄧叔度與僕凡六人至夜格夫自外歸就

邀同飲仰之是日對棊屢敗德茂任直時出罵

坐語叔厚謂子可以詩紀事否翌日戲成長句

朱何王鄧偶婆婆晚喚寒甥共笑歌煩惱少因知事少

謂德茂

吃拳多為打人多竹間豪逸多酣暢斗下文章競

拂摩好是花時省風雨勸人沈醉是天和

飲葉氏園亭不覺大醉歌側詩呈德茂仰之并

### 簡二何

步入青冥路渺賒嵐光四面照流霞相公未許歸旌節  
旅客還來看物華不獨衰腸難勝酒自緣饑眼乍看花  
醒來知免汙茵席端為勤勞不駕車

葉雲仰之謂予有隨軒人作無真詩請仰之用

前韻

方外參軍語太賒文茵萋斐錦成霞齊王國印封韓信  
古戰場文識李華不醉而狂烏變白以無為有舌生花  
嚇燕書自何人計只問軍中李左車

詩去得仰之報云旦夕必有風雨可速相過走  
筆以詩報之

幕下郎君發醉吟多如年少惜花心預排尊俎當長日



不遣韶華負寸陰種竹澗邊排坐石讀書窻下聽鳴禽

草堂更要添顏色剝借隣花酒淺斟

仰之宗族皆有侍女不肯借用每令

長鬚行酒仍勸客醉而後止

葉伯宇和霞字韻詩再作一篇

全似襄陽隱士家只添靈照減丹霞晚山寒後猶疑遠  
古木春來亦好華酒似竹光仍闕綠人如錦面更添花  
了知衰病輕成醉不但流涎向麴車

慶吉父七十作詩叙事

里有仁賢慶壽祺不辭沽酒典春衣年高且作尋常看  
身健須誇七十稀頰火欲燒雙鬢白心閒時笑昔年非  
誰誇八座天人貴丞相星垣動紫薇

帥相生日二首

季管吹灰木落洲天邊初獻鷓鴣裘邦家襲慶因前續  
嶽瀆儲精自幾秋秦晉君臣三晝接安危將相百年求  
休論辟穀功成後只恐功名卒未休

整頓乾坤不作難指間造化自多端恩回春色華風暖

氣接秋天絕塞寒勛爵已增曩鼎重功名長入畫圖看  
錫公難老無他驗但覺斯民欲再安

贈吉父得女孫

兩兩星階協泰符為嘉瑞雪勝維旗果如靈照翁何恨  
若比倉公數有餘慰眼臘娘能剪綵他年楊惲競傳書  
斷無豪客窺籬落為自從前免破除

賀張帥

日邊春早帝王州花滿黃堂壽醕浮世有忠嘉扶社稷

天教勲業紹箕裘  
稀鳴抱鼓無倫市  
屢敞園扉罷慮囚  
已佩荷囊筵鴛鴦  
徑將名姓覆金甌

門弧瑞靄曉氤氲  
天錫熙朝社稷臣  
京兆赭裾多譽久  
甘泉紫橐眷恩新  
一城和氣仁風畫  
萬口歡聲壽語春  
端有泮宮蓮幕士  
願隨綠水泛通津

喜楊致平登第

寄隱湖頭知幾年  
聊城一箭自家傳  
便須結組隨鴛鴦  
暫捨銜杯樂聖賢  
鶴到九霄方展翅  
驥行萬里可加鞭

隔江阻預金錢會夢到君家社甕邊

得周朋詩云方為祕府書石渠二字作詩美之  
幹地排天力有餘倚空金榜稱華胥快兼長史三杯酒  
優重中郎六體書字向雲門增瑞彩思從天陛聽傳臚  
集賢學士相驚顧應道揮毫古不如

李叔飛以僕遷官遠貶長牋而僕在江亭無以  
報謝因寄小詩

知君才氣本無雙拭目曾看古戰場華萼風流今不墜

文章光焰自應長詩從古錦傳家法身

原缺一字

花塼是故

鄉它日萬錢供日費更期粟賤致時康

舊聞邵叟名今識面目於詩句字畫中輒取二

詩賡之他日會面亦舊相識也

平生高士苦交疎今見音容向一書輸子一籌吟未足  
加人數等盍分餘供陪應覺山勞費捃拾不教春自如  
詩社便宜張客館莫教游士嘆無魚

曾參古佛問忘情可笑初孩尚未名自刻肺肝誠定誓

時牽耳目又寒盟苦無藉在書牕冷賴有知憐風竹聲  
好是鼻端消息在夜堂流水夢初成

送猶子之官武昌

旅情傷別意何如霜打枯茄雪未除門戶難成攻事業  
慇懃暇日讀詩書須憐白髮親今晚莫恃朱顏氣有餘  
要使仇香非醉尉定知不負武昌魚

孫叔誠宰南峯過信道諸暨舊事往往能記拙  
詩因以送之

身是前身念已非相逢喜誦昔年詩  
心情似舊知無日  
兒女成行能幾時  
政事便須書竹帛  
功名何必問蒼龜  
盱江風月時分寄  
免隔關河費夢思

送蔣推官歸宜興

陽羨溪頭蟹正肥  
三年客盡拂征衣  
一川秋色背人去  
汭流而行  
故云背人  
滿路黃花迎子歸  
未用解裝榮故里  
少須通

籍扣天扉紅粧莫作離凰怨  
自有鵲鵲接翅飛

推官道  
中期有

得子之慶故  
末章及之



庸齋薛微之里居時與僕為莫逆交亂後寓洛  
西時來關中每相見必詫郝壻之為人歲辛未  
秋紹先沿檄至長安始得因杯酒接殷勤觀其  
氣概知庸齋之不予欺也今因其歸詩以餞之  
玉潤冰清久著名長安一見眼增明笑談已了關中事  
慷慨還成灞上行桑落酒邊還適意渭城歌裏莫傷情  
寄身琴鶴堂中相早為皇家致太平

送錢顯道赴臨安學宮

紛紛獄市如棼絲與子共事西江湄地連遠近多雜俗  
事出衆口無同辭文章幸子老益壯蒲柳怪我秋前衰  
從今所願望天路十年莫放攻多遲

送章明章善解官奉親還吳中

了知天意貴生全南嶽夫人奉化權當日論功門戶重  
至今傳澤子孫賢聊書馬上三年課最愛杯中一百篇  
君寵母恩如已報暮雲春樹約他年

病卧江城五見秋惟君向我用青眸廩人白粟長相續

官簿青錢不用求  
向日傾心今得意  
犯嚴薦口昔徒羞  
期君通籍金閨後  
喚我松江共釣舟

送魏滁州

惠政從來到處寬  
民心歡喜吏心寒  
醉翁亭畔霜初肅  
釀酒泉邊菊未乾  
紫綬繡衣催傳送  
黃童白叟挽車看  
今君已是滁陽守  
父老猶稱魏長官

寄朱德茂

生涯非富亦非貧  
恰好容君放曠身  
種竹種松須傍水

有花有酒不求人功名夢幻吾無與豁達襟懷德有鄰  
半醉將須天地窄玲瓏峯頂看紅塵

寄丁求安

鬱密林巒十丈餘包羅萬象徧方隅吳王劒沼連巴峽  
廬阜飛泉貫具區賈老華夷分寸尺輞川花柳較錨鉅  
別來不恨江湖遠只在君家聚米圖

寄朱仰之

年齊甲子性同宜相見論文更不疑小約同行先具酒

且推獨步放君基庭前雁鷺能堪否堂下龜魚暫付誰  
好向藍田報消息多栽松竹待哦詩

寄劉行簡

西來有客解歸裝先說東臺白首郎顏貌宛如周柱史  
鬚眉皆是漢馮唐百年未覺強弓滿新厯還添漏箭長  
欲寄平安恐煩報桃花川裏漾舟忙

寄丁執中

米鹽煎蹙意何如盡日逍遙不費書債作拘留身莫贖

詩成困瘡力難除事錢不謹兄移愛與世留心客有餘  
幸各身閒好同伴相思如許却相踈

寄廉公範

塵滿簪纓緇滿衣幾人真解棄如泥水方流急收驚楫  
藩自無心看觸羝陶令縱教貪漉酒謝公寧不念烝黎  
也知雅意人難會笑對西山是指迷

寄李元叔

北臺御史共推貧饑走三吳幾閱春繻袴遠聞歌政績

江山應復助詩神  
鄉尊耆舊多遺事  
地有神山得近鄰  
料得新篇滿中篋  
好分風月寄閒人

寄何子楚

冬餘春晚未收書  
一棹相過兩日餘  
久擬從容來語舊  
豈期盟約未尋初  
風隨雙鹿樵中隱  
人似三閭澤畔居  
櫻筍厨煙茶焙火  
從來心事不相踈

寄鄭公老

一投魚目得雙珠  
恍覺光寒照坐隅  
郡政已知先歲課

高文何不副時須法官屬籍忠勞久弔死傷孤里俗蘇  
已分漂流寄江海甘從父老啖蒸壺

寄徐稚山

曾攬輶軒一整冠江西吏膽至今寒疲民仰德方為貴  
野老言公不似官身必靜休猶是病心無揀擇始知安  
高情未得真消息試仗詩筒一問看

寄張文彥

掃葉林間一夢回別來秋物已驚催書通意外慙慙語



詩寄閒中氣味來花木成陰如結幄庭除自轉不蠲埃  
俱生北地俱流落誰得楊枝送一杯

寄李叔飛見振叔云叔飛嘗見訪不遇

難逢易別景如梭戀戀思君可奈何煩捨朱黃曲尋訪  
偶穿城市直經過簪朋恨阻陪吟嘯文會知難聽琢磨  
何處恰如長對面遇心無事便高歌

寄李叔飛

襟懷皤皤久沈淪念子令人白髮新蘇季揣摩雖未試

陳平容貌不長貧要須業履能追古不信儒冠解誤身  
早達才名未為貴王楊盧駱愧前人

贈曾絃父雪中歸

越得君侯解珮時平臯千里散瑤卮來時馬上寒休問  
歸日蘭房夢已知不獨吳娘誇舊事重教江上聽新詩  
鳳書恐逐春風到催起車輪不放遲

絃父望日欲載酒過南池且云已得潘風酒鄭  
顧道亦作詩再叙南池風物以酬曾使君吟賞

之意

盡意粧成出曉窻  
燕脂頰淺綠雲長  
水僊鹵簿三千女  
瓦影龜魚一味涼  
雞舌舊傳僊客句  
芬陀長帶梵天香  
使君玩物無留物  
為爾臨流欲泛觴

贈鄭吏部

春草牽吟費夢思  
一杯相屬重熙怡  
誰知道路添新歷  
只覺精神勝舊時  
鳳子即今車接翼  
議曹他日政無私  
春風吹轂還催起  
從此愁添五路基

雨中贈尹少稷

滯雨昏風漲野田  
旅亭猶幸竊高眠  
閉門不為辭賓客  
開卷端如揖聖賢  
夢裏莊周花裏蝶  
醉中徐邈酒中僊  
老來此興非吾事  
靜識東君意自傳

和伯氏韻贈王元明  
元明舊親予叔行也  
今死於賊矣

十分佳處限長淮  
人在空明靜

原闕一字

猜水北結茅真好

去袖中漫刺為誰來  
因嗟翳日塵凝榭  
更弔沈槍臥綠

苔多少平崗遠淮路分明逐處是池臺

野樹霏煙不傍城還知高士欲逃名倦投芒屨春隨處  
笑起孤帆潮又生曾宿客來門不掩無心人住鳥忘情  
郊原盛事知多少出郭當朝共眼明

贈鄭季洪季洪屢以詩文見示

近無鄰曲雜塵氛遠有聲名海內聞白雪兩眉誰顧我  
青銅三百擬邀君波濤入筆潮千尺

鄭以潮賦見示奇甚

義勇橫

胷士六軍早辦林間茅一把與君分坐看晴雲

贈何著作

淨名梵行宰官身跡似空花意自真豈為世間呈伎倆  
正緣物外長精神牕橫午榻簾篠靜日上朝盤苜蓿新  
誰與塵寰說消息不爭好惡莫疑人

送法榮師歸吳興榮自清江退院而歸

又作三年一夢回浮雲何地是根栽身隨東土因緣去  
袖帶西江風月來碧眼已傳胡相具白頭誰問故人猜  
與君別後同參處雪裏梅花次第開

贈聞老

給孤園下化叢林  
堂上雷音振海音  
十六師兄同本願  
三千法界一慈心  
有時去作人間雨  
無事不聞齋後禽  
悵望四年留五日  
自知清濁易分襟

留贈道場老慧苦眼疾

雲中白鶴塔千尋  
為衆同南古到今  
五百年來一聲錫  
四禪天外百花林  
長眉白黑歸宗眼  
苦口因緣黃蘗心  
方見道場多勝境  
盡情呈現付知音

游純房見李叔穎郎中詩因思叔穎聊繼其韻

贈淳化禪師

衲衣處處逐浮雲  
法乳何妨長子孫  
室有巾幘留祖意  
門無車馬露苔痕  
名高楚澤多新侶  
夢入苕溪有舊言  
誰與隱峯居士說  
曾參一句是同門

遊天聖邂逅正師知藏作詩贈之

乘流自謂不得死  
生意逢師聊具論  
無心已盡世間義  
舉足不隨天上尊  
本源了了明月觀  
餘事衮衮洪濶翻



我生流落勢未已期師盡老依僧園

贈開先悟老悟老述情三頌自持淡泊不事化

緣夜坐舉枯木話二首

放懷澹泊省拘持應物無方自不疑我國晏然君莫問  
他心通處我為誰靜無淮浦他年夢老與廬山宿命期  
到了百年俱任運世間屈曲自推移

身如枯木了生涯那更迎春競物華金粟病中猶示衆  
如來到處不須誇毗盧法藏無心供兜率陀天自散花

比似出門千萬事何如豐儉且隨家

天池贈回老

平地相逢已二年重尋勝處少留連  
千峯拱足煙霞表飛鳥啣花几席前  
白雪擁牕齋竈冷春風吹谷野芳妍  
四時坐斷閒消息古佛心燈萬古傳

贈後庵顯裕僧

壞色寒帷破面藤寄情顯裕一孤僧  
花天捧日朝分供山鬼呼風夜撲燈  
何日庵居同兀兀羨君身外只騰騰

是非不到爭多少前寺經山只一層

元日倦卧書齋聞僧食未敢歌鼓聲作繼以清  
唱感而戲作

蚤鶯聲轉雜危弦驚散書牕午枕眠大法鼓聲胡部曲  
摩登伽戲野狐禪眼中顛倒迷情事世上縱橫使鬼錢  
爛煮瓠壺鍾鼎食山堂誰道獨翛然

伯氏自儀真招寶覺師住持以詩促行

白沙太守性多能儒業箕裘祖佛燈酒減三分留待客

草高一丈遠招僧見成齋飯非長計創立叢林是大乘  
好住為山十年後牯牛爛攢不須繩

送寶覺禪師

夏淺春餘宇宙清溪山千里送君行今宵柳岸半輪月  
何處花村飛錫聲衣挽嶺雲猶帶濕鶴隨杯渡不須驚  
江頭一線輕帆急穩壓鯨波氣自平

過慈感知古閑黎為童行落髮留飯偶已食不  
果留

曉衝輕浪遠煙迷聞道方為訓導師綠髮小童辭俗日  
白頭老子泛舟時自緣旅客疏盤早不是闍黎鐘飯遲  
欲別慙慙更留客逢君知是舊相知

和伯氏別元老贈行

相見還如相別時杖頭明月舊相隨五亭溪下西風靜  
六合沙邊夏日曦洗鉢又辭香積飯傳衣仍是雪山兒  
要須桑下無三宿不為淮南塞草衰

留贈太平劉道士

早歲希夷合道真八年靜默已全神收還赤子無為境  
留得丹霄自在身獨與老莊談妙理不分儒釋是殊倫  
有時醉露真消息流水桃花不誤人

和贈鄭法師

僊翁八十保純精自解真符不送迎信是虛閒能却老  
從教草木不知名交鄰有興開三徑只用無求度一生  
聞說嵌巖雲石路翁能行處我能行

和贈知宮

洞門九鎖是天關出世那知在世間行客衝煙排洞戶  
主人失足到人寰飽餐蔬筍充朝暮便與孤雲結往還  
因為羣仙作家主却應我到勝君間

元夕夜與戒琳殊三老僧對碁琳請作詩賦之  
白布衫講時節新嬌鬟豐口綺羅春滿城菡萏官同樂  
午夜簫歌社降神繼晷尋碁三淨侶聞燈堅坐一間身  
不須強學行春客兒女多應不要人

與長老夜話出故人俞宋護書予至山之日俞

書適至書中又相問訊感而賦詩二篇俞郊居  
發源草堂蔬圃教子讀書鄉人重之間近苦目  
疾殊可念

三十年餘病作魔相思長恨隔關河僧窻開讀君書至  
丈室分龕我暫過憶爾音容如會合感懷踪跡念蹉跎  
兩篇價有千金重若比千金更不磨

法海空門老伏波發源槐市病維摩道無同異要當爾  
命有窮通可奈何兩目再清張籍在一經傳子鳳毛多



飽聞行業書鄉社得失功名付浩歌

得小兒書寄二陳學顏字有楷法

前代風流顏太師英風烈烈動朝儀危身已著當時節  
正筆猶開百世疑兒作此書真識路翁因憶汝念臨岐  
慇懃莫改平原脚慶及門間會有時





欽定四庫全書

集部

東牟集卷五

詳校官左中允<sub>臣</sub>瑋五珠

主事<sub>臣</sub>呂雲棟覆勘

膳錄監生<sub>臣</sub>范重榮

膳錄監生<sub>臣</sub>章濤

欽定四庫全書

東牟集卷五

宋 王洋 撰

七言律詩

酒熟未酌鄉人次第固未及伯氏伯氏因失酒

以詩謫之謹繼韻解嘲

滿盎濃薰靄綠雲可憐珍韻不長存病妻功罷初嘗液  
壯士酣餘更破樽十日留春傳古昔一宵遺愛有鉶盆  
明朝試榜揚雄宅恐有壺車忽到門

謙仲好古攜酒見過伯氏以詩謝之次韻

我生南北本殊津邂逅相逢若聚蘋故納破愁成一笑  
應憐對影只三人居嫌共邑猶分袂醉覺同心只異身  
送客溪邊一惆悵新歡過眼又前塵

次蘋字韻即事

飄零何處是通津陸有飛蓬水有蘋賦稟但隨升斗祿  
姓名常後百千人趨炎未肯施先足耐冷何須便曲身  
祇有鳴埧恐難繼此心端欲避芳塵

伯氏再以前韻卽事復繼韻

問宅無成復問津青衫長是照青蘋生涯異日知何地  
性命如今正屬人螻蟻命輕難報國蟲魚買絕拙謀身  
五年湖海成何事只得冠纓不染塵

伯氏以詩投郭謙仲叙未相過之意次韻

相過何日買輕舠十里思君奈鬱陶莫謂遠煙迷野樹  
且看飛絮舞江臯難追競病傳清晝且合亡何引濁醪  
除却醉鄉岐路穩人間無處不風濤

高民瞻以前韻作詩因酬

釣叟生涯止一舸興來猶復醉陶陶知君自欲營新築  
繼世那聞有舊臯野性素來便野趣春山唯恐欠春醪  
果能過我論文字且擬張帆看怒濤

民瞻再作詩復以前韻酬之

報我新詩疾轉舸論文始信賴薰陶追風定見驥千里  
鳴野今聞鶴九臯看劍為君傾薄酒張弓何日畏春醪  
不煩更問珊瑚樹舊繡年來折海濤

和伯氏德清道中

解組歸尋梵釋宮  
帆風舟轉疾飛蓬  
棠陰留付長江外  
山色收來數筆中  
聞說笑談供燕席  
有時魚鳥襍簫筒  
豈唯政譽歌襦袴  
文字由來繼古風

伯氏臨江使君寄薌林次韻

力盪橫空萬斛舟  
一函酬唱紀川遊  
篇篇秀潤東南竹  
落落珠璣小大鄒  
人物百年同富壽  
客懷千里夢逡遒  
主人合作鯨川楫  
無奈高情寄一邱



君王勸駕一輕舟，賜履西江飽勝遊。  
井邑詩書今化魯，春秋盟會不書鄒。  
詩中侯印知無分，筆下尊拳勿太遒。  
快讀新章與神會，蠹闕門掩夢經邱。

和伯氏

松竹窻邊拂簡書，芙蓉水伴戲龜魚。  
鴈行千里時一往，蜂得一房聊共居。  
千二百年形骨健，三十六計米鹽疎。  
齒牙缺落無衰病，慚愧當年謝幼輿。

又

眼見羣兒倦走書明瓊忽報漲雙魚造端萬緒自成室  
迷路多岐要卜居談氏龜兒門相在微之道保曉星踈  
願翁壽考貽孫子文有千箱德有輿

次曾吉父韻

憔悴非同十載前旅酬那復似初筵  
密房羽客非無課木局枯棊亦任緣  
得酒且思陪笑語著詩終欲共林泉  
北壇居士新登拜租得茶山又一年

曾吉父出示和鄭固道病中詩次韻

行藥蕭晨放步遲嘯臺秋色飽秋時樂天何意病為伴  
樊素不收春自隨舊雨故人頻問疾茅君使者淨窺基  
拂衣身健丹楓路積壓風光剩費詩

吉父用晁恭道韻作詩謝同會次韻

蒲柳先衰祗自驚靜思前事似前生力侔元氣推先覺  
醉打愁城堪一行求援援睽緣富厚鼓宮宮動亦虧成  
會當載酒論奇字日暮江天得細傾

曾吉父以詩招客次韻

醉吟居士桃李曲忠孝相家鸚鵡杯情隨蘭畹碧香注  
詩送茶山煙雨來溪邊官柳意欲盡枝上海棠紅半開  
不應物色相攜手驚喚南池春夢回

和吉父賦隨字韻

此生休戚已前期命薄天公不可移一飲且同今日醉  
數篇曾見古人詩青山招我成長計白髮欺人亦太癡  
莫與老翁疑甲子當年猶記會沙隨

和吉父示送別七言

景物隨人也解愁年來護草不忘憂微官自縛敢辭冷  
倦鳥縱歸何處投一歲又聞禾黍熟百年惟喜甲兵休  
人生佳節真難遇莫惜重陽菊滿頭

和吉父還絃父詩

病折丹心一寸灰猶憐花月照雲壘碧腴既許投交分  
黃菊從教却放開上客醉時花婀娜綺筵歌罷月遲徊  
集韻徊  
通作回白頭賀監頻三請好客從前招不來

和吉父贈絃父詩

瘡有黎邱競出奇操矛不報主人知問渠去處終無定  
與我周旋便有期貧似淵明猶愛酒瘦如工部只緣詩  
但教酒入無功社何用詩稱國士為

和魯磁父簡吉父伯南坡

柳徑桃蹊草色新一年春半又侵尋無情燕子疑巢冷  
多怒鳴蛙互目禁滿眼為花留色艷轉頭遺我是清陰  
莫愁艇子芙蓉櫂且聽拏音作好音

和磁父小雨秋涼

時豐報祀拂黃收共說金穰更幾秋

來歲方在金

樹染烟濃

山着色月臨天迥水明樓盈困忝答三時力七字詩銷  
萬斛愁飽飯哦詩醉山月不妨歸老一扁舟

和磁父攜家南坡期以招客

日日尋春春未休高情可是愜風流詩如濯錦江波色  
身在浣花流水頭行想袿裳分襞積晚因魚鳥得遲留  
草堂費盡無人寄悵望前溪獨自愁

答秀實見招

此身初不敢圖安老去偏憂行路難欲調舟車難用法  
偕行僕從只宜寬已持食節多虞病嫌重裝囊少慮寒  
且替疲兵充守宅詩成莫惜寄來看

秀實監丞復寄二篇譏商彥不至亦微見及因

次韻

案此詩二首  
其一見七絕

折除官職是聲稱利達文章不易并聯句每容分短韻  
五言今始見長城將軍莊畔傷沉甲處士廬邊笑盜名  
我欲抱鋤歸問婦擲掄未許餉春耕



和嘉仲秀實九日詩

幸分微祿養閒身，杖策登高擬令辰。  
貧愧臧員招酒伴，閒多債數得詩人。  
不辭眼見黃花舊，却恐花驚白髮新。  
人道二疏賢父子，我疑文采是天倫。

次二兄韻

短筵投迹類蓬麻，何似差吟得當樵。  
藏跡豈期今脫死，迎軍幾處早分髻。  
池塘帶雪猶涵溟，林谷先春已豁舒。  
莫謂寒荄更無分，春來也解露雙芽。

僕近還舍以一篇餉秀實蒙以兩篇見酢謹用  
前韻再酬一篇

春行日日度芳林僧夢回看午轉陰閒喜林塘多靜態  
忙輸蜂蝶見花心三杯酒後逢人醉幾首詩多取意吟  
慚愧孟郊三百首何人收拾薦薰琴

和周秀實用前韻

老知白髮媿花林望絕華筵繼晝陰病與物疎銷火性  
貧知分薄更灰心春收紅紫如辭客風入松篁得伴吟

莫恨疏盤欠何肉文園病渴只因琴

和周仲嘉再示三篇

舊日夜冠說武林風流曾不減山陰百年人物千山秀  
萬里功名天下心族姓人人誇盛事溪山處處稱高吟  
後生欲聽清商曲莫學無絃只撫琴

花有芳叢竹有林春來各競趨光陰妍媸等是目前事  
冷淡方知異日心十二里山長隔面一帆風地每傳吟  
高山流水人知否綠綺牕間自曉琴

長篇大軸勢如林，慰我窮愁正結陰。  
數首娛憂兼寓物，幾人對面便知心。  
多求筆吏供濡墨，剩買筠筒給浩吟。  
閒靜心情如此少，能聽賀若是知琴。

秀實再用前韻惠詩再答

身似鷓鴣寄遠林，仍將病骨卜晴陰。  
有情緣墮有情法，無處雲知無處心。  
棊對僧牕時自縱，詩傳人口不堪吟。

感君裁鑒多清賞，收拾焦桐爨下琴。

右答  
見贈

聲馳南國秀千林，逸氣終疑困華陰。  
病任燒空不燒火，

詩唯傳句不傳心當年宗魯江西夢異日晞顏洛下吟

直把風流付邱壑真如封鎖匣中琴

右答  
自述

和知字韻二篇

春來秋去鎖煙扉此境人間不易知強遣憂愁須藉酒  
巧傳消息却因詩生緣有累難除藥性本無為不用醫

苦樂從來略相對乘車須記飯牛時

右答  
解嘲

全無客到掩庵扉冷煖心腸祇自知貧欠飯租難乞米  
午虧睡課且裁詩已傷刀自驚逢敵多病人難更說醫

強半工夫付詩軸獨慚騎吏立門時

右答  
寄贈

和秀實扉字韻

柴車朝出莫柴扉麋鹿情通麋鹿知  
寓目每因思舊約破顏時幸讀新詩  
妻兒債負真寃境祖佛因緣即妙醫  
救火抱薪還止火只嫌虛幻沒休時

奉酬秀實報章外以前韻示謔且聞灼艾次韻  
早衝料峭別巖扉惜別音容意自知道上  
每因同客笑篋中常恨少君詩飽參靜定  
推先覺苦炙虛空得下醫

菽韭盤空春睡起伯仁還遇火攻時

和仲嘉示秀實

去秋九日失歸期今度花前又過時  
喚客便宜傾鑿落與誰同伴插酴醾  
新甘未厭松江鱸敏捷先酬季父詩  
莫道野翁無食品葵羹爛煮亦偏宜

和秀實答仲嘉

未春先以約春期載酒如何却負時  
遙想醉狂哦舴艋也知歸客趁酴醾  
阿瞞氣懾周瑜陣樊素心貪白傅詩

橫槊賦詩俱占却據鞍矍鑠正相宜

和秀實

十風九雨一春除散綠留紅證夏初  
心事自應隨念遠年華未省向人疎  
欲開胃次猶湏酒泛若因緣却為書  
飽滿盤天久無望良規真恐在污渠

和秀實寄尹商老見訪

二千里外命車輪慰我言詞字字新  
自向江西逢隱吏方知物外有高人  
頻將篇什收風月急整形儀作搢紳



相對茅簷終日語從教人道是沉淪

再和答秀實

紅剝芳菲綠作叢遙知惆悵兩心同  
結交舊燕多情語  
消病殘花無用紅  
獻計欲居塵境外  
投名且向酒壺中  
新來但覺多新樣  
不道襟懷盡古風

老境看來亦悄然方知世味有無邊  
忙中受用非關我

靜裏風光總是禪

易原缺

常叅饑後眼

酬有

茶酬有二  
字疑誤

只

有飽時眠周翁百事多恬退詩律從來不受憐

和秀實別寄二篇

世德聯綿自漢朝元功當日說蕭曹營分細柳威名重  
笑指飛煙量度高文挾素勲誰與敵詩推餘事尚稱豪  
了知三阮逃名久恐被名牽未可逃

香火社間慕度日溪山伴靜酒為年碧霄鶴唳詩情遠  
湖院僧知茶夢圓

謂二  
間叟

常喜春鉏行佚老每嫌慕路尚

爭先平湖草岸經行好後夜延緣刺釣船

秀實惠簡問間居消息有滴水滴凍之語以詩

報之

氣血扶輿夢幻身用多補少不調勻如今滴水滴凍客  
便是貪花貪酒人髮白容衰爭早晚官榮家富費精神  
空花若解揩摩盡方識人間一笑春

晨鐘齋鼓住僧園縱不陪堂已一般恐為因緣略相似  
若無消息自難安樂為苦本宜先戒病是良醫要好看  
為問爐香經卷外有無塵妄更相干

得丁執中書和前韻依用韻一首

履堅抱節有誰如本為書窮更買書命欲問天何厚薄  
貧多聞道是乘除倉箱粟帛常虧課庭戶芝蘭獨獻餘  
氣味如君略相似只論詩律媿空疎

趙筠州惠書賀冬道予得宮觀訝久無書且勸  
滿泛壽杯及問老妻安否

筠陽太守舊知聞筆力清新思不羣泰道自當隨紀歷  
蹇塗何用慶書雲杯中旨酒衰難盡牀上愁妻病未分  
故向琳宮同寂寞一爐香火伴清芬

杜倅再示前韻繼之

慚愧詩筒數往回自嫌局促困驚材塵蹤已挂舊官壁  
妙語猶隨新雨來好客共謀良夜醉養花長得四時開  
知君客裏猶行樂端為襟懷不染埃

不惜分餘為借光情同結客少年場誰知親拜六篇語  
全勝遙聞十里香自嘆滿頭頻獻白敢言三姐欲懷黃  
一餅一鉢煙波裏徑入苕溪向水央

再酬杜倅兩詩用前韻

報道春風莫便回  
少陵準擬作詩材  
公然背我堂堂去  
略不隨人得得來  
花占三春官已滿  
河專一壑幕初開  
已知風物長流轉  
得舉朱絃且拂埃

昨朝珠玉已爭光  
再轉旌旗再擅場  
景物歲時俱婉婉  
德人言語亦馨香  
歌風燕子初爭語  
藏柳鶉兒學畫黃  
牽率賡酬無健句  
鸞聲只合聽央央

楊先寄安仁因簡熊叔雅趙令并次前韻

三年築冶困塵迷  
且拂塵埃下錦溪  
客子雲山無定宅

令君桃李已成蹊  
閒情聊賦籬邊菊  
快意須分物外題  
粉署仙郎卧江渚  
相逢莫惜醉如泥

葛祕校和予闕字韻詩兩篇再以一篇奉酬

數州形勝共鄉關  
江浦淮堦一望間  
長恨崎嶇千里隔  
那知邂逅兩身閒  
稻粱要足幾時足  
閭井欲還何日還  
猶勝拘牽名利客  
心無一事看春山

沈大虛以下求安韻寄兩篇次韻

案題稱兩篇詩止一首或

沈所寄者兩篇同韻故止和一篇也

長淮千里擁雙旌攬轡曾聞志已清槐市早年先走譽  
橋門多士羨蜚聲山長靜默溪長綠人有豪華物有英  
早赴官閒剩尋賞它年車騎不單行

子楚寄吏報章復用前韻再寄一篇

長須晨送一函書語不周遮意有餘雨滿一犁知過望  
草開三徑喜如初黃魚白酒江頭市綠竹青蒲隱士居  
病後世緣多懶惰相逢詩酒未全疎

和趙倅兼善觀徐園詩



雨閭長亭去驛賒寒帷  
那免歎年華應緣問俗  
頒溫詔却得名園看好  
花晴入郊圻初浩蕩春  
隨杖屨得津涯仙郎不  
解收珠玉別乘歸時載  
滿車

再次前韻

堆案文書不用嗟  
新詩字字說芳華  
題輿事省時眠草  
綸閣文高合判花  
莫待春歸空悵望  
須知醉裏有生涯  
如何為向邦侯說  
整頓清明載酒車

厚載王君求僕賦寄閒齋詩  
又欲僕作晚實此

君二詩皆未果惠然枉佳篇甚厚非老鈍所及

聊次韻奉酬

布鼓何堪付阿香平生癡絕亦長康曲成下里安知宋

䟽就中郎不姓常

厚載詩及僕近奏封事然孤遠無援助非有常何為之先容也

未許

芳馨依杜若遙窺光怪識干將秋風一水空相望留滯

何時貢玉堂

和徐思遠韻

幾葉文章開一花布裘中句已名家無心於世苦亡賴

生子如郎定可誇行矣齋房思賈傳莫將高論詆王嘉  
冥鴻一去自千里寂寞沙村只望涯

和滕宰與徐思遠

徐節孝先生之子

故國愁來有所思那堪更讀四愁詩令君術業輝千古  
處士才名冠一時醉後嘯歌爭氣馱間來履屐共追隨  
詩豪酒俠方推重野客何知但朵頤

和徐思遠歲除

節物催人莫自悲開顏且喜看君詩飯拋宿歲因輕棄

酒為迎年故重違照鏡不收寒鷺影藏鈎新與少年期  
何須直待東風醉紅燭花前且滿枝

徐思遠出示月夜登樓詩句法甚高不類平生  
語幸少卑之在我輩中自不失為社頭且使時  
見一斑也

幾處澄輝幾處秋好閒時上水明樓誰憐老子風前興  
為遣中郎醉上舟一帶橫空長漠漠時看飛棟影悠悠  
今宵踏月歸時節莫罵徐郎只暗遊

李尹叔知丞借華嚴于仙山予楚以詩道其事

李有和詩因以次韻

與君淮浦接鄉關聞道忙中也自閒身似浮花真客宅  
心歸實地是家山牕明篤耨朝烟細榻靜簾條午夢殘  
更問前生李居士南行今到幾人間

和張中大

天作長綃玉作圖恍然身世在水壺歲期共飽如頌粟  
瑞要均行勝得珠未辨五湖揚短艇且謀雙鯉喚長鬚

清朝不要培芝菌正好稱觴頌正符

憶昔開元夜宴圖錦為方丈玉為壺但誇北里樓吹笛  
誰問長安米勝珠事去牽連難雪耻愁來陪奉長霜鬚  
兔園巖穴皆時彥一斗青精過刻符

楊仲承祕書蹉跎三年今得榮州文學冬日貽  
書以詩答之

昔年曾嘆小差池官帶榮名自有時二火並光君有漸  
一茅覆屋兩相宜心田自樂緣知足世路無求亦少思

好是一丘藏曲折也無鄰里共追隨

節日同兒女小集倅有詩見戲答之

白首相看一病妻也能舉按與眉齊  
誨兒共織麗翁竹  
養氣多慚紀消難作惡不須嗟室罄  
驚魂長幸脫征輦  
團樂欲說無生話試借先生刮眼鐮

和江如晦

蕭寺姑分一日光人生同調穩相當  
空齋夜語規前哲  
帶酒論文恐老狂三獻三休真琬琰  
一前一却笑螳螂

君家江左才名舊會向長塗一振驤

婦未生兒先製名人生適意但隨情有無何預它人事  
輪奐當期異日成收拾功名須義勇較量得失是心兵  
鄙文不用量輕重久已無心羨世榮

和黃朝請

謀身學業愧淵雲急退還慚谷口真可是有生同冗長  
真成無補費精神抽簪早覺宏圖遠側席時聞妙語新  
共道徵君似顏子升堂今日見詩人



極目關山不斷雲  
嶺梅開處若為真  
沈迷簿領政無術  
展拓詩章筆有神  
夜市鬻茶如訪舊  
曉粧吹頰自爭新  
長溪西畔煙霞遠  
聞有風光屬主人

和方丞觀碁詩兼戲戎琳二僧

會得頭頭理趣微  
此如未會即傾欹  
試看一路爭先着  
何異三乘占上機  
但使無心須百勝  
多因弄巧陷重圍  
條條白黑分明路  
苦被旁觀指是非

和呂令見寄

莫話艱難徧九區門前吐吐尚堪沽眼中寒暑頻傷鴈  
閒裏心情要憶鱸政似釣璜歸大老詩能引士愧非夫  
暄風暖日明年事共樂烘春造化爐

和平甫

八節灘頭老醉吟年來愁也不勝禁須知到處難忘酒  
有意來時且抱琴欲與君游忘世慮若非吾事莫關心  
相期早晚塵緣外共訪毗耶聽梵音

和謝方智善

瀟湘十畝弄柔猗獨染啼斑事已奇但愛波聲鳴犇確  
不須蠅翅避琉璃莫疑山路崎嶇險解脫繩橋性命危  
慚愧平生竹上座得相隨處每相持

和聖求

桃花人面共春風人去桃花自笑紅  
撩亂絮飛春物後依稀雲散夢魂中  
鶯遷是處皆良友蝶化知誰是主翁  
莫訝求仙杳無信賣花人過小橋東

和叔穎楮衾

自顧生來骨相屯不容強覓綵衣輕榮華地位無多子  
寂寞因緣已半生我擁素衾方自喜君貽組句遂兼榮  
書牕對榻仍搖腹誰道挑燈夢不成

酬凌季文過楊仲誠

慢綠遲紅靜不爭小梯斜倚上空明日篩竹影花奴睡  
人度禾場吠犬驚散帙未甘書效晚携筇獨喜病骸輕  
排芳穿密多幽處後日相期子細行

和朱祕校惠詩

了了臞儒說舊章三鍾初試楚金良當年尚老君方壯  
此道催人意已忘懶逐肥塵規冷炙甘同貧女借餘光  
誰家春草能終惠惆悵還同病乘黃

短檠燈火幾經秋古遠人疎道不侔可惜詩書架三萬  
不如奴婢橘千頭顏回賦祿唯簞食林類當春亦破裘  
見說老人懷舊事夢中吹笛更能不

和吳朝議

邵武

小說風烟已自佳前峯矗矗為盤牙千重巖壑名卿宅

本郡名公  
多居山谷

一簇樓臺刺史家自媿虛涼無物望難將術  
業向人誇所聞政績刊金石刻畫無鹽學篆沙

自是天公亦厭艱十年戰士好休閒胡兒弓射燕陲月  
漢將心馳海上山慶事頻聞輸帝府好音傳落到人間  
丈人自是朝廷舊早趁鵷鸞入近班

謝運屬秘書惠詩

雪撲征鞍岸漲沙不辭天闕去程賒江梅笑處人為客  
仙桂香時鴈到家秦地少年應辨酒江南詞客好酬花

錦衣綵仗還鄉路欲訪萍蹤問釣槎

謝邵武危秀才惠長箋

須知秋日勝春朝一鶴凌空振羽毛  
滿軸文章慰衰病十年燈火困英豪  
良醫先為肱三折合負終看釣六鰲  
鄭老襟期幸同調新詩時與寄亭臯

以越箋與三四弟有詩次韻

無復花生拙筆頭一生長負剡藤羞  
過門多是陳驚坐得句誰憐趙倚樓  
社友書來頻寄語山翁鬢已不禁秋

老干仙去吾宗冷有繼華星一字不

謝呂令子卿雪中遣人惠酒初令人置酒于祝  
舜俞呂令以酒為惠云

也知謀醉勝謀閒戶小都忘滿腹慳晚得麴生投老伴  
長邀玉友訪空山初貪雪裏香宜倍忽報餅中酒自還  
全勝朱提雙飲盞親教從事送酡顏

王提幹送雲安春色以詩還酒尊

萬里關河未說長亡何鄉是醉中鄉客居江館當炎熱



春日雲安逸色香  
沽水童奴思給酒  
乞錢司業更傳觴  
藍橋不用鴛鴦語  
只合壺中貯玉漿

陳長卿凌季文自弋陽寄酒麴以詩謝之

六十行年兩鬢蒼  
興來猶愛引杯長  
黃翁壚下山河遠  
酒母車來驛傳香  
碧落侍郎燒鼎訣  
粉闌仙客駐顏方  
三斟卯飲心無事  
一枕亡何是故鄉

曾法師嘗寄蒲萄追作一篇

自分蔬腸甘苜蓿  
那煩遠騎送蒲萄  
青條自有悠揚勢

甘液多因灌溉勞坐見滿盤堆馬乳全勝千里惠鵞毛  
病來苦不勝杯杓今日思君飲濁醪

曾畝父惠黃龍菜

朝日團團上碧峰蔬盤牢饌四時同園供小摘添幽事  
雨打寒菰帶晚濃可但拈香參玉版直須進步禮黃龍  
溪堂炊甌客千客不打闌黎飯後鐘

挽向伯恭

十里林花帶月蘿壠頭車馬斷經過可憐人物今如此

試問天公事若何籬下淵明惟酒菊舟中范子任煙波  
璇題金榜垂霄漢千古榮名定不磨

絕代風流世所希如公真是命難推三辭令尹高前哲  
兩挂儒冠當盛時丞相耐官天語貴左師習禮楚人知  
試看流慶當何似滾滾長江不盡期

挽徐次翁

仁義功高澤子孫衣冠由是古王門位升五品鵷鸞貴  
政在三州民社尊一旄豈期江漢遠千年惟有德風存

了知大末淵源在功業臯夔付後昆

自想溫容耳誨詞他鄉已恨重分違  
送人作守乘軒去結草為靈象  
備歸會合只如風過燭花陰何異月澄輝  
相門子壻諸侯服除却清名百事非

挽喬民瞻

案此詩二首  
其一見五律

楚鄉槐市憶當年錦繡文章六藝先  
朱紱哀憐應有在白頭故舊各淒然  
修文地下埋英骨遺愛江城付綵編  
造化於公意良厚不教丹旆涉長川

挽向倅

案詩二首其一見五律

耐官丞相山河業靖國簾帷社稷勲四姓風流傳學問  
三朝潤澤慶來雲重車折軸人何力積閱傳家子有文  
史筆它時汗青簡左師家譜紹清芬

王侍郎挽章

案詩二首其一見五律

當年幕府拜英遊十載烏絲換白頭城郭俱非前日夢  
關山如舊一天愁詩人已作潭移影往事休論江自流  
物色佳城閉何許西山凝望不勝秋

挽玉山詹教授

鶴髮雙親歲月殘  
既霑三釜即心歡  
廣文未脫一官冷  
范叔寧忘昔日寒  
文中八科名益重  
魂歸千里命尤難  
後生它日思風範  
只向傳銘石上看

哭周秀實

餘英初約轉舡蓬  
二載廬陵郡課同  
官簿縱居時俊後  
詩名舊列昔賢中  
三斟屢酌前溪月  
一瞬曾帆下渚風  
千里音容從此絕  
夢隨江水遠朝東

翁來謂有世間情翁棄人寰一葉輕白玉樓成金闕峻  
步虛章就紫霄清笑談烈燄懷飛壁寂寞空潮自打城  
大筆如椽石似玉何人為與說平生

哭宋文淵

清懷凜凜古人風尚憶當年語意同開口劒鋒初論事  
歸林弱羽已傷弓累朝因草襟懷內四海悲歡指顧中  
寂寞門闌感恩客曾將頑質謝磨礱

藹藹聲華動帝宸一時車馬走芳塵文如屈宋才仍富

心似皋夔道已醇身後功名因報主生前勛業為憂民  
知公本意安劉氏不許身危更累親

哭沈行彥宮教

氣迥神清形骨立藍綬紆腰垂四十年侵運櫛髮蒙絲  
日晚煮黎羹不粒教司胄子祿方來日薄西山風已急  
平生失意固多端忽向幽泉猶飲泣

挽黃夫人

向奉使姻家陳  
長卿姑黃簿妻

官棲枳棘莫消魂身託絲蘿在德門三后姻聯門戶重



貳卿閱閥德名尊傷心結蟻靈轡遠保室鳴鳩道化存  
為問如何慰冥漠飽聞中外有蘭蓀

挽楊承事并夫人詩二首

除却家傳教子經世間百事不營營自應藝學推前輩  
故得風流勸後生疏傳揮金終足食徐卿有子自成名  
後來若不流餘慶真享千鍾亦未榮

夢協幽蘭故可誇來從君子更宜家疏恩自合開新邑  
比德還應副六珈解使威儀同詁訓聊隨輕薄事鉛華

自從瑤瑟初扃後檻外春風懶放花

哭孀嫂

徐仲貴  
先生女

文章夫子才難盡孝弟人言報自賒  
四事先生俱擅世一塗後裔不傳家  
歲當豐暖偏寒餒朝正歡娛獨歎嗟  
報施若教長似此幾人守道不回邪

雙眼失明二十載一身病卧四週年  
俱生孤女眼前死諸御四兒姑幸全  
徧歷人間真苦惱畧無身後好因緣  
靜思四十六年事一夢三生業夢圓

目疾

天公嗔我眼長白故著昏埃阿堵中不怪參軍談瞎馬  
但妨中散送飛鴻著籬令惡誰能對損讀方奇定有功  
九惱從來是佛種會如那律證圓通

和李商隱賦紅梅

公主簷間睡起時勾紅行繞大安池非人未識春迷眼  
妃子偏憐酒入肌更若施朱疑太赤不須生女白如脂  
由來風骨都相似豈為丹青別賦詩

梅蕊年年破臘時  
玉花飛舞集鸞池  
獨將艷色添真色  
任爾冰肌映雪肌  
帶恨不妨紅作淚  
洗粧終見白凝脂  
可憐渠有風流句  
只作歌詞不作詩

和方智善兩色梅

春到冬餘去住間  
玉樓無處不輕寒  
鮮鮮魏女履下履  
粲粲真妃冠上冠  
眼亂互搖歌扇羽  
心驚添著粉闌欄  
東君厚薄非無意  
一種馨香兩眼看

書窓梅花數枝病起再見  
餅中盛開因作

書堂籬落冷如灰十日相忘亦自猜  
初訝凍枝無艷脈那知寒室自花開  
銅餅結實元非種節屋迎春似有媒  
方信陽和滿天地不須人力費根栽

貴溪尉廳黃梅盛開濃香豐艷非凡品可及尉  
坐此速招客因成小詩戲之

歌酬花意醉酬春笑口相逢可厭頻  
不飲正疑花怨客典衣莫聽婦傷貧  
天生尤物非為福蚌有明珠亦累身  
墻裏佳人墻外笑冶容招悔豈無因

觀瑞香杏花二首

陌上春風已半酣，薰籠院靜怯輕寒。  
織成花錦傳香密，養就嬌羞對客難。  
山路不知清夢遠，宮衣猶惜舊花殘。  
若將品第分高下，須向芝蘭格外看。

瑞香

絳萼紅顚帶露肥，燒林長近禁烟期。  
且容北郭通鄰徑，若比南枝較發遲。  
曲水邊尋舊事，賣花擔上揀繁枝。  
香韉一色垂楊路，何似吳王宮裏時。

杏花

和陳長卿賦芭蕉

落落虛懷好自珍一番舒展一番新  
搖風捲起窗鋪月  
滴雨驚回夢愴神  
荔子丹時陪獻豆  
丁香結處共愁塵  
本無顏色爭韶艷  
野老由來不怨春

一幅青天世外珍  
詩人得句共清新  
書生几上側理紙  
巫女廟中巴峽神  
長恐天寒憑日暮  
不將翠袖染緇塵  
世間荷葉并蕉葉  
不與紅芳競占春

賦洞庭柑

兩潮船上別蘇台  
歲歷侵人鶴化胎  
霜實可憐今入眼

佳人何日問重來黃金丸逐驚飛肉白露團凝別恨腮  
重待扁舟落吾手為君先報柳郎回

磁父得洞庭柑分送往往難過賞者因成小詩  
綠玉波心聳絳台丹霞道士日傳胎仙人不惜黃金貴  
海蜃遙驚驛使來玉食光輝天著力主家春色雪融顚  
手中三日香猶在不是吳姬乞打回

磁父出示趙倅木犀詩次韻

黃姑斲月種文犀落向三秋月滿時巖邑疏封兄弟國



銅餅分派子孫枝漢宮明艷塗嬌額仙鼎珍丹散漉籬  
好趁燈花同報喜黃間金粟正相宜

趙倅兼善再用前韻賦木犀

物外家風本自奇人間獨步九秋時誰登月姊青霄露  
折得却說丹桂枝韞玉巖扉通戶牖蕊珠花殿徹藩籬  
淵明不共真香醉只與黃花作便宜

茶薺

蠹闌草掩日蕭疎自汲寒餅煮澗蔬早愧空腸添雪乳

何須雜珮列瓊琚  
往陪雪繭千重貴  
顧試鉛刀一割如  
風露滿樓人未散  
小窗應為賦歸歎

龍涎香

零露紉荷楚澤艎  
未參南海素馨仙  
大門當得桂花酒  
小樣時分寶月圓  
詩挾少陵看妙手  
屏通神物為垂涎  
使君少往幽蘭曲  
時傍顰山照鬢邊

